



PERSEVERA



Un página di kurashámentu i guia spiritual pa miembronan di
Scouting Antiano

Sèptèmber 2020

Edishon 70

“Perseveransia”

“Perseveransia ta hasi nos hende ku un karakter aprobá pa Dios; esei na su turno ta yena nos ku speransa. Anto e speransa ei no ta defraudá nos, pasobra Dios a drama su amor den nos kurason pa medio di Spiritu Santu ku El a duna nos.”
(Romano 5:4-5)

E palabra di Dios di awe, ta enkurashá nos, pa ban biba un bida ankra na Dios. E ta enkurashá nos pa keda uni ku Dios apesar di kon difísil bo situashon por ta.

E palabra ta siña nos perseverá. Perseveransia ta un birtut di Dios ku ta hopi importante pa nos. Perseverá ta nifiká, keda konfia, no entrega, no bisa mi ta kla òf ku mi tin basta. Perseveransia ta bisa bo, sigui numa.

Perseveransia ku ta ankra den fe, ta duna bo un lus ku ta inspirá bo, pa sigui biba, pa sigui padilanti apesar di tur kos ku bo por ta pasando na e momentunan ei.

Tin un dicho ku ta bisa: ‘miéntras anochi no sera, kareda di biná no a kaba’. Ora bo ta un hende ku ta perseverá ku fe, nunca e anochi no ta yega, te pa e sera.

Perseveransia biba ku fe, ta kibra kadena nan di skuridat. Apesar ku por ta skuridat por ta rondoná bo, bo mente i bo kurason ta yena ku e lus di perseveransia.

Perseveransia ankra den fe, ta kita mal airu fo’i bo. Perseveransia ankra den fe ta hasi bo, un hende positivo, un hende amabel i un hende ku ta komuniká lus di bendishon.

Perseveransia ta kita mal deseo, òf deseo pekaminoso, fo’i hende ku ta ankra nan mes den fe. Bo ta bira hende ku un kurason limpi i puru.

Perseveransia ta uni nos ku otro i mas ku Dios. E ta hasi bo un hende ku ta buska interes di otro i no redu di otro. E ta hasi bo un hende ku bo ta sakrifiká bo mes pa otro. E ta hasi bo un hende ku ta sali fo’i kurason di Hesus, pues sirbidó.

Perseveransia den fe, ta hiba na tin un relashon mas profundo ku Dios. Bo ta bira un hende ku ta kumpli ku e mandamentunan di Dios, speshal esun di amor.

Perseveransia ta ofresé bo alternativanan nobo semper. Bo ta buska solushon, en bes di keda yora bo presente. Bo ta bira un hende ku ta keda mira e kara di Dios.

Ta p’esei, San Pablo ta siña nos awe ku un hende ku ta perseverá, ta un hende ku e karakter aprobá pa Dios. Su karakter ta aprobá pa Dios pasobra, e hende ku ta perseverá ta keda mira Kristu komo su úniko alternativa.

Perseveransia ta hasi bo kurason, unu di amor i karga di Spiritu Santu. Bo kurason ta bati riba ritmo di esun di nos señor Hesu Kristu.

Perseveransia ta trese klaridat den bo bida. Durante e siman aki, ban biba e perseveransia di Dios. Kiko ku pasa ku bo, keda perseverá i lo bo tin speransa.

Life is the most
difficult exam.

Many people fail because they
try to copy others, not realizing
that everyone has a different
question paper.

